



Kejadian pokok tumbang di Jalan Sultan Ismail Selasa lalu menuntut pengurusan pelan lebih baik elak tragedi berulang. (Foto BERNAMA)

DBKL tambah baik Pelan Pengurusan Pokok Rendang

Garis panduan baharu dijangka siap Julai, kerja pemantauan terus dilaksana

Kuala Lumpur: Dewan Bandaraya Kuala Lumpur (DBKL) sedang menambah baik Pelan Pengurusan Pokok Rendang, serta menyediakan garis panduan baharu yang memfokus aspek pokok berusia dan berisiko tinggi di ibu negara.

DBKL dalam satu kenyataan memaklumkan garis panduan baharu itu dijangka siap Julai depan, namun pihaknya akan terus menjalankan kerja pemantauan terhadap pokok berisiko dengan mengambil kira aspek pemeliharaan dan pemuliharaan alam sekitar.

Setakat ini, menurutnya, sebanyak 175 pokok sudah dikenal pasti berisiko tinggi yang mana sebahagian besarnya berusia lebih 50

Keratan akhbar BH, Rabu lalu.



tahun, dengan 147 daripada pokok terbabit sudah ditebang.

"DBKL menerusi kontraktor yang dilantik sudah menjalankan pemeriksaan ke atas pokok berusia lebih 30 tahun atau yang mempunyai ukur lilit lebih 1.5 meter, di sekitar Kuala Lumpur sejak 2019.

"Pemeriksaan berkala dilaksanakan oleh arboris bertaualiah. Pemeriksaan terakhir ialah pada Februari 2024, dengan 28 pokok dikenal pasti akan ditebang dalam tempoh terdekat," katanya.

Pantau keadaan pokok

Menurut kenyataan itu lagi, pokok berisiko merujuk pokok yang berpotensi tinggi mengalami kegagalan struktur serta tumbang, manakala penilaian risiko pokok

pula dilakukan dengan mengambil kira keadaan fizikal pokok di tapak.

"Jika keadaan pokok didapati tidak memuaskan, penilaian lanjut diikuti dengan tindakan mitigasi seperti cantasan, rawatan akar atau penebangan pokok, akan dilaksanakan," katanya.

Dalam pada itu, pihak DBKL menzahirkan dukacita dan ucapan takziah kepada semua mangsa dalam kejadian pokok tumbang di Jalan Sultan Ismail, Selasa lalu.

"Bagi mangsa terbabit, DBKL akan membantu untuk memudahkan cara apa-apa tuntutan kepada pihak yang sewajarnya, dengan mereka boleh menghubungi talian 03-2617 9509 (Jabatan Kewangan) atau 03-2617 9236 (Jabatan Undang-Undang dan Pendakwaan)," katanya.

Dalam kejadian kira-kira jam 2 petang 7 Mei lalu, hujan lebat serta angin kencang menyebabkan sebatang pokok tumbang sehingga meragut nyawa seorang lelaki dan dua lagi cedera, selain menghempap 17 kenderaan serta landasan Monorel di Jalan Sultan Ismail.

BERNAMA